

**AKASHVANI AIZAWL**

**REGIONAL NEWS BULLETIN**

**HEADLINES ( EVENING )**

- 1. Kawnpui leh Sairang inkar kawngchhe zualpui hnawh nan sorkarin cheng nuai 100 a ruahman a, zaninah hna an thawk tan nghal ang.
- 2. Joint Civil Society of Mizoram (JCSM) chuan Kawnpui leh Sairang inkar kawng chhe lai tawite chu darkar 48 chhunga siam tan turin NHIDCL an phut thu an sawi.
- 3. Parliament fur thutkhawm chu vawiin khan tan a ni.
- 4. Prime Minister Narendra Modia chuan tun tum fur Session chu hlawk taka hman a beisei thu leh sawihona tha tak an neih theih a beisei thu a sawi.



**KAWNPUI-SAIRANG ROAD**

Kawnpui leh Sairang inkar kawngchhe zualpui hnawh nan sorkarin cheng nuai 100 a ruahman a, zaninah hna an thawk tan nghal ang.

Vawiin khan Chief Minister Pu Lalduhoma hovin Mizoram kawngchhe chungchang sawihoa thutkhawm a ni a, he hunah hian PWD Minister Pu Vanlalhlana, PWD hotute leh Finance Department hotute an tel a. Kawnpui - Buichali - Sairang kawngpui chu NHIDCL te kuta awm, state sawrkar mawhphurhna ni tawh lo ni mah se, nitin chak lakna pui ber a nih avangin nikum lama sawrkarin a lo hnawh tawh angin, kuminah pawh a zualpui hnawh leh mai ni se, an ti a. Hnathawh nan cheng nuai 100 an ruahman nghal a ni.

Darlak - Tuidam inkar kawng chu a kawng thar zawk sialtu contractor te an tlakchhiat avangin an contract tihtawp loh theih lohvin an awm thu thutkhawmah hian tarlan a ni a. Tender thar chhuah dilna central sawrkarah a awm mek thu leh he dilna hi chak taka umzui mek a nih thu tarlan a ni a. A helna, kawng hlui, tuna hman mek chu PWD lamin a zualpui lo thawm tha se tiin an rel a, cheng nuai 20 an ruahman a ni.

*Chief Minister hoa Mizoram kawng chungchang thlirhonaah hian kawngchhe thawm tura an rel te bawhzuitu tur Coordination Committee, Secretary PWD kaihhraina hnuaiah din a ni a. Anni hian hmanraw mamawh te lakhawmin zanin atangin hna an tan dawn a. NHIDCL lam pawh na zawka nawr ni se, central sawrkarah pawh a tul anga hriattir ni se tiin an rel bawh a ni.*

*Thutkhawmah hian Mamit - Bairabi kawngpui chu a grade a tha na a, khuar erawh a tam rih thu tarlan a ni a. He kawngpui hi hman theiha a awm reng theih nan a tul lai apiang thawm that ni se an ti a. He kawngpui hi engemaw thulha Kolasib lam kawngpui a lo pin pawha hman theih niin a thawm that nan cheng nuai 65 pek chhuahn se tiin an rel bawh a ni.*

Hetihlai hian, Mizoram Oil Tanker Drivers' Association (MOTDA) President Pu Romel Lalruatdika chuan kawngchhia avanga an tuialhthei phurh an chawlhsan chu chhunzawm zui ni se an ti tih a sawi a ni. MOTDA hian kar kalta Zirtawpni khan thuchhuah siamin Kawnpui atanga Sairang inkar kawng chhia chu Oil Tanker tlan nan a him loh avangin kawngchhia hi tlan theih pangngaia siam a nih hma chuan an lirthei din tir an tum thu an sawi a ni.

Kan corr report lo ngaithla zui ang.

*VC*

*MOTDA President Pu Romel Lalruatdika chuan Thawhlehi hian kawngchhia chu a hmunah an pawl hrutaituten tlawh an tum naa Fak Hlawh Lo Val Rual pawl ten kawngchhia chungchang sawiho turin pawl hrang hrangte an kohkawm avangin an tlawh thei rih dawn loh tih a sawi a. Pawl hrang hrang kalkhawmin an rorel azirin an awm dan a danglam theih thu sawiin hetihrial hian tun dinhmunah chuan tlan theihna tura kawng siam that a nih hma chu din rih an la tum thu a sawi a ni.*

<><><>

**JCSM**

Joint Civil Society of Mizoram (JCSM) chuan Kawnpui leh Sairang inkar kawng chhe lai tawite chu rang taka siam turin NHIDCL an phut thu leh darkar 48 an ngaihchan dawn thu an sawi.

JCSM hotute hian Aizawl Press Club-a chanchinbumite an kawmnaah he thu hi sawiin kawng chhe zual lai chu kilometre khat pawh tlinglo nia an ngaih thu an sawi a, tun dinhmunah NHIDCL hian hna thawk lovin a hmuna khawl an chhawp pawh kawng chhe siam tur niloin lirthei tang hnuk chhuak tur mai a nih thu an sawi a ni.

**Byte of Dr Vanlalsiama Chhangte.....**

JCSM chuan kawngchhia avanga lirthei lian tangkhangin nasa takin Khamrang khaw mipuite tan harsatna a siam thu an sawi a. Lirthei a tangkhang zel a nih chuan Khamrang khua leh a chhehvel bakah truck khalhtute ei tur leh mamawh ngaihtuhsak thuai a tul an ti a. Hmalakna an hmuh loh chuan hnatlangpui koh mai an tum tur thu an sawi a ni.

Kan corr report lo ngaithla ang.

VC

*Mizoram chhunga kawngchhe kaihnawihah Hachhek Constituency Maxi Cab Welfare pawhin, Tuidam to Darlak, Sabual lui lam kawng chu siamthat a nih hma chu Nilaini atanga tiam chin awm lovin an service dawn rih lo tih an sawi a. Kawng chhia bakah hian Oil Tanker te an nawrh avangin tuialhthei lamah harsatna a awm avang te, motor lian Balu phur leh adangte an tlan reng avangin kawngpui chu passenger leh motor tan a him tawk loh avangin an ding rih dawn tih an sawi a. Siamthat a nih veleh an service leh dawn an ti a ni..*

*Kawng chhiat vanga Tuialhthei phurte an tlanloh avangin, Lawngtlai District ah chuan Petrol leh Diesel ah harsatna a thlenloh nan DCSO Pu Lianchhuma Chinzah chuan Tuialhthei pekchhuah zat tur bituk a siam a ni.*

<><><>

## AIZAWL WATER SUPPLY

Kar kalta Inrinni zan atangin Aizawl tui lakna Phase I leh Phase II te chu a chawmtu lui tui a nut nasat avangin Pump Off vek a ni a, tui nut lam hi 982 NTU a ni.

Hemi chungchanga sorkar thuchhuah tarlan danin, tui nut avang hian nimin Pathianni nilengin Tui pump theih a ni lova. Vawiin zing dar 8:00AM atangin Single pump-in Tui pump tan leh a ni a. Hetiang a nih avang hian Aizawlah tui sem a khaihlak leh ta a ni.

<><><>

## PM DAJGUA

Planning Secretary Pu Lalmalsawma Pachuau chuan PM DAJGUA chu kalphung mumal tak nen Mizoramah kalpui ani a ti a, mipui tam thei ang berin a hlawkna an tel theih nan hmun hrang hrangah hmalakna kalpui ani tih a sawi.

Pu Lalmalsawma Pachuau chuan Dharti Aaba Janjatiya Gram Utkarsh Abhiyan hnuaiah mipui a mamawh tak ten scheme kaltlanga tanpuina an hmuh theihna tur leh sawrkar laipui atanga hamthatna hrang hrang an hriat ve theihna tur atana ruahman a ni a ti a, Mizorama sawrkar department 14 chuan hmun hrang hrangah hna an thawk tih sawiin hmasawwna chak zawka a awm theih nan theihtawp chauh ani tih a sawi.

### ***Byte : Lalmalsawma Pachuau***

DAJGUA Scheme hi hmarchhak bial mipuite hnenah sawrkar laipui atanga hamthatna hrang hrang a thlen theihna tur leh a chhawrtu mipuite hnenah sawrkar atanga hamthatna an kawtkaia chhawpchuah a ni a, Mipuiten awlsam taka an hriatthiam theihna turin IEC Campaign nasa taka neih niin mipuite hnenah engtin nge hamthatna a thlen dan chhinchhiah vek a ni a, harsatna awm chu tarlan niin a chinfel dan ngaihtuah chu a tum ber a ni.

PM-DAJGUA hi Ministry 17 laiin hmarchhak bial mipui khawsak dinhmun siamthat a, chawikan an ngaihna laiah sawrkar nen thawhhona tur scheme a ni a,

India ram chhunga district 549, block 2911 leh Khaw 63,843 chhunga tribal mi vaibelchhe 5.38 huamin Mizoramah pawh khaw 383-ah hman a ni.

<><><>

**AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

**PARLIAMENT**

Parliament fur thutkhawm chu vawiin khan tan a ni a. Thlaleh August ni 21 thleng neih tur a ni. Vawiin Session tan niah house pahnih Lok Sabha leh Rajya Sabha-ah chuan vawi engemawzat inkhawm tihtawp a ni a. Opposition memberten thil phut an neihte nasa taka an aupui avangin rorel thei loin house an siam a. An thil phut zingah hian Operation Sindoor chungchang sawiho an phut a ni.

<><><>

**PM**

Prime Minister Narendra Modia chuan tun tum fur Session chu hlawk taka hman a beisei thu leh sawihona tha tak an neih theih a beisei thu a sawi. Tukina sesson tan hmaa Parliament tuala chanchinbumite a kawmnaah he thu hi sawiin Pu Modia chuan mipui rorelna sawhnghehin a awm dawn tih a sawi a. Session an neih thin chu mi tinin theihtawp chhuaha ram tana an hnathawh lanchhuahna anih avangin ram tana hun ropui tak anih thu a sawi ni.

<><><>

**RAJYA SABHA**

Rajya Sabha Chairman Jagdeep Dhankar chuan vawiin khan Rajya Sabha member thlan thar pahnih leh member ruat pathumte rinawmna thu tiam tirin a lalut. Member thlan pahnih vawiina lakluhte hi Assam atanga thlan tlin AGP hruaitu Birendra Prasad Baishya leh BJP atangin Kanad Purkayastha te an ni a. Anni bakah hian nominated member Dr. Meenakshi Jain, C Sadanandan Master leh Harsh Vardhan Shringla te an ni a. Rajya Sabha ah hian member pasarih sunna hun hman a ni bawk..

<><><>